

XXI

È tandu si prisintò a volpe.

— Salute, disse a volpe.

— Salutatu, rispundì gentilmente u principellu, chì si vultò senza vede à nimu.

— Sò quì, disse a boce, sottu à u melu...

— Quale sè tù ? dumandò u principellu. Sè pocu billucciu...

— Sò una volpe, disse a volpe.

— Veni è ghjoca cù mecu, prupunì u principellu. Sò à l'addisperu, s'è tù sapissi...

— Quessa ùn si pò fà, disse a volpe. Ùn sò micca ammansata.

— Oh ! scusami, fece u principellu.


Ma, dopu riflessu, cuntinivò :

— « Ammansà », chì vole dì « ammansà » ?

— Tù ùn sè micca di quì, disse a volpe, chì cerchi ?

— Cercu l'omi, disse u principellu. Chì vole dì « ammansà » ?

— L'omi, disse a volpe, anu i fucili è vanu à caccia. Hè pocu casticu ! Facenu dinò e ghjalline. Hè cusì chì elli si valenu calcosa. Cerchi e ghjalline ?



— Innò, disse u principellu, eiu cercu amichi. Chì vole di « ammansà » ?

— Quessa ùn la sà guasgi più nimu avà. Vole di « ingiardinà leie », vole di...

— Ingiardinà leie ?

— Hè capita, disse a volpe. Tù, finu ad avà, par mè di più à un zitillucciu listessu à centu mila zitillucci ùn sè. È ùn aghju micca bisognu di tè. È mancu tù ai bisognu di mè. Par tè, di più à una volpe listessa à centu mila volpe vulpine eiu ùn sò. Ma, s'è tù m'ammansi, emu da avè bisognu unu di l'altu. Par girà u mondu sanu, tù sarè par mè solu di a to qualità. Par girà u mondu sanu, eiu saraghju par tè solu di a me qualità...

— Cumenciu à capisce, disse u principellu. Ci hè un fiore... Crengu chì ellu m'avarà ammansatu...

— Sarà, disse a volpe. Si vede di tuttu à nantu à ista Tarra...

— Oh ! ùn hè micca à nantu à a Tarra, disse u principellu.

A volpe parve intricata assai :

— À nantu à un'antra pianetta ?

— Iè.

— Hè ci ne cacciadori à nantu a issa pianetta ?

— Micca.

— Bona quessa ! È ghjalline ?

— Mancu una.

— Ci hè sempre calcosa cuntrariu, sospirò a volpe.

Ma ripigliò u so filu a volpe :

— A me vita hè tutta à tagliu paru. Corgu e ghjalline, l'omi caccighjehjanu à mè. Sò tutte listesse e ghjalline, è sò tutti listessi l'omi. Vene à di chì m'annoiu appena. Ma s'è

tù ammansa à mè, sarà quant'è à accende u sole di a me vita. Cunnusciaraghju una scarpata mancu appena listessa à l'altre. L'altre scarpate, quand'e e sentu mi vogliu intanà. A toia mi farà esce da in tana, cum'è una musica. È po fideghja ! I vedi quallà i campi di u granu ? Eiu pane ùn ne manghju. Ùn si vale nunda par mè u granu. Ùn m'arricordanu nulla à mè i campi di u granu. È cusì hè troppu tristu ! Ma tù ai i capelli culor di l'oru. Allora, hà da esse maravigliosu quand'è tù m'avarà ammansatu ! U granu — hè inuratu u granu — mi farà pinsà à tè. È m'hà da piace u rimore di u ventu in li campi di u granu...

A volpe chitò è fighjulò u principellu una bella stonda :

— Fà u piacè... ammansami ghjà !

— Vulè, vogliu, rispondì u principellu, ma aghju pocu tempu. Cercu à fà mi l'amichi è aghju una mansa di cose à cunnosce.

— Cunnosce, si cunnoscenu e cose chì omu ammansa, disse a volpe. L'omi ùn anu più tempu da cunnosce nulla. Compranu cose fatte è lestre ind'è i marcanti. Ma ùn ci ne hè marcanti d'amichi è elli amichi ùn ne anu più. S'è tù voli un amicu, ammansa à mè.

— Chì ci vole à fà ? disse u principellu.

— Assai pacenza, eccuti u versu, rispondì a volpe. Prima ti chjinarè à pusà un pocu luntanu da mè, ind'arba. Eiu ti curaraghju neciu nicioni è tù ùn dicjarè nulla. Cù e parolle s'hè sempre ingallarati. Ma, ghjornu filu ghjornu ai da pudè pusà più à vicinu...

U dopu ghjornu u principellu vultò.